

तीतुस कै नाम प्रेरित पौलुस की चिट्ठी

1 पौलुस की ओड़ तै जिस ताहीं पणमेसर के छोट होए लोग्गां ताहीं उनकै बिश्वास म्ह सहायता देण कै खात्तर अर म्हारे धर्म की सच्चाई ज्ञान की रहनुमाई कै खात्तर भेज्या ग्या सै; **2** ओ मैं न्यू ज्यांतै करण लागरया सू के पणमेसर छोट होया ताहीं अनन्त जीवन की आस बँधै। पणमेसर नै, जो कदे भी झूठ नीं बोल्ला, पह्लडे बख्त तै अनन्त जीवन का बचन दिया सै। **3** उचित बख्त पै पणमेसर नै अपने सुसमाचार ताहीं उपदेशां कै जरिये प्रगट करया। ओए सुथरा संदेसा म्हारे उद्धारकर्ता पणमेसर की आज्ञा तै मेरै ताहीं सौंप्या गया सै।

4 म्हारे समान बिश्वास म्ह मेरे साच्चे बेटे तीतुस ताहीं:

म्हारे परम पिता पणमेसर अर उद्धारकर्ता मसीह यीशु की ओड़ तै अनुग्रह अर शान्ति मिलै।

क्रेते म्ह तीतुस का काम

5 मन्ने तैरे ताहीं क्रेते म्ह इस करके छोड्या था के ओड़ै जो कीमे अधुरा रह गया सै, तू उस ताहीं ठीक-ठाक कर दे अर मेरै आदेश कै मुताबिक हरेक नगर म्ह बुजुर्गां ताहीं ठहरावै। **6** उस ताहीं नियुक्त जद्दे करया जावै जिब ओ बेकसूर हो। एक बिरबान्नी का धणी हो। उसके बाळक बिश्वासी हों अर अनुशासनहीनता का दोष उन पै ना लगाया जा सकै। तथा वे निरकुश भी ना हों। **7** निरीक्षक ताहीं बेकसूर तथा किसे भी बुराई तै अछूता होणा चाहिये। क्यूँके जिस ताहीं पणमेसर का काम सौंप्या गया सै, उस ताहीं अडियल, चिड़चिड़ा अर दारुबाज नीं होणा चाहिये। उस ताहीं झगड़ालू, नीच कमाई का लोभी नीं होणा चाहिये **8** बल्के उस ताहीं मेहमानां का आदर-सत्कार करण आळा, विवेक आळा, धर्मी, भगत तथा अपने पै काब्बू राखण आळा होणा चाहिये। **9** उस ताहीं उस बिश्वास करण जोग्गा संदेस नै मजबूती तै धारण करे रहणा चाहिए जिसकी उस ताहीं शिक्षा दी गयी सै, ताके ओ लोग्गां ताहीं सही शिक्षा दे कै उन ताहीं प्रबोधित कर सकै। तथा जो इसकै बिरोधी हों, उनका खण्डन कर सकै।

10 यो ज्यांतै जरूरी सै क्यूँके भोत से लोग बिद्रोही होके

खामखाँ की बात बणान्दे होए दुसरयां ताहीं भटकावै सैं। मैं खास करके यहूदी पृष्ठभूमि के लोग्गां का उल्लेख करण लागरया सू। **11** उनका तो मुँह बन्द करया ए जाणा चाहिए। क्यूँके वे जो बात नीं सिखाण की सैं, उन ताहीं सिखान्दे होए घर के घर बिगाड़ण लागरे सैं। भुन्डे रास्तयां तै धन कमाण कै खात्तर ए वे इसा करै सैं। **12** एक क्रेते के बासिन्दै नै अपने लोग्गां कै बारे म्ह खुद कह्या सै, “क्रेते के बासिन्दै सदा झूठ बोल्लै सैं, वे जंगळी पशु सैं, वे आलसी सैं, पेडू सैं।” **13** यो कथन सत्य सै, इस करके उन ताहीं डाडतै डाँटो-फटकारो ताके उनका बिश्वास पक्का हो सकै। **14** यहुदियाँ के पुराणे वाक्याँ पै अर उन लोग्गां के आदेशां पै, जो सत्य तै भटक गे सैं, कोए ध्यान मतना द्यो।

15 पवित्र लोग्गां कै खात्तर सब कीमे पवित्र सै, किन्तु अशुद्ध अर जिन म्ह बिश्वास नीं सै, उनकै खात्तर कुछ भी पवित्र नीं सै। **16** वे पणमेसर नै जानण का दावा करै सैं। किन्तु उनके काम दिखावै सैं के वे उस ताहीं जाणदे ए नीं। वे घृणित अर आज्ञा का उल्लंघन करण आळे सैं। तथा किसे भी आच्छे काम ताहीं करण म्ह वे असमर्थ सैं।

साच्ची शिक्षा का अनुसरण

2 किन्तु थम सदा इसी बात बोल्या करो जो सही शिक्षा कै मुताबिक हो। **2** बुजुर्ग माणसां नै शिक्षा द्यो के वे शालीन अर अपने पै काब्बू राखण आळे बणें। वे गम्भीर, विवेकी, प्रेम अर बिश्वास म्ह मजबूत अर धीरज आळे सहनशील हों।

3 इस्से ढाळ बुजुर्ग लुगाईया नै सिखाओ कै वे पवित्र माणसां कै जोग्गा उत्तम बिवार आळी बणें। निन्दक नीं बणें तथा भोत घणी दारू पीण की लत उनै ना हो। वे आच्छी-आच्छी बात सिखाण आळी बणें **4** ताकि जवान लुगाईया नै अपने-अपणे बाळक अर धणी तै प्यार करण की सीख दे सकैं। **5** जिस तै वे संयमी, पवित्र, अपने-अपणे घरां की देखभाल करण आळी, दयालु अपने धणीयां की आज्ञा मानण आळी बणें जिसतै पणमेसर के बचन की निन्दा ना हो।

6इससे तरियां गाबरूयां नै सिखान्दे र्हो के वे संयमी बणें। 7थम अपणे आप नै हर बात म्ह आदर्श बणा के दिखाओ। तेरा उपदेश शुद्ध अर गम्भीर होणा चाहिए। 8इसी बढ़िया बाणी का इस्तेमाल करो, जिसकी बुराई नीं करी जा सकें ताके तेरे बिरोधी शरमिंदा हों क्यूँके उनके धौरै तेरै बिरोध म्ह भूंडा कहण नै कीमे कोनी होवैगा।

9दासां नै सिखाओ के वे हर बात म्ह अपणे मालिका की आज्ञा का पालन करें। उनै खुश करदे रहवें। उलट की बात ना बोल्लै। 10चोरी चालाकी ना करै। बल्के पुरे विश्वसनीयता नै दिखावै। ताके म्हारे उद्धारकर्ता पणमेसर के उपदेश की हर तरियां तै शोभा बढ़ै।

11क्यूँके पणमेसर का अनुग्रह सब माणसां के उद्धार के खातर प्रकट होया सै। 12इस तै हमनै सीख मिळै सै के हम पणमेसर विहीनता नै नकारा अर सांसारिक इच्छा नै ना मांदे होए ईसा जीवन जीवें जो विवेकपूर्ण नेक, भक्ति तै भरपूर अर पवित्र हो। आज के इस संसार म्ह 13आशा के उस धन्य दिन की बाट देखो जब म्हारे परम पणमेसर अर उद्धारकर्ता यीशु मसीह की महिमा प्रकट होगी। 14उसनै म्हारै खातर अपणे आप ताहीं दे दिया। ताके ओ सारे ढाळ की दुष्टतायां तै हमनै बचा सकै अर अपणे छॉटे होए माणसां के रूप म्ह अपणे खातर म्हारै ताहीं शुद्ध कर ले — हमनै, जो उत्तम काम करण नै लालायित सैं।

15इन बाततां ताहीं पूरे हक के गेल्या कह अर समझान्दा रह, उत्साहित करदा रह अर विरोधियां नै झिड़कदा रह। ताके कोए तेरी अणसुणी ना कर सकै।

जीवन की उत्तम रीति

3 1माणसा नै याद दुआन्दा रह कै वे राजाओं अर अधिकारियों के अधीन रहवें। उनकी आज्ञा का पालन करें। हर ढाळ के उत्तम काम्मां नै करण कै खातर त्यार रहवै। 2किसे की निन्दा ना करै। शांति-प्रिय अर सज्जन बणें। सब माणसां के गेल्या अच्छा बिवार करै।

3यो मैं इस करके बताण लागरया सूं क्यूँके एक बख्त था, जब हम भी बेअक्ले थे। आज्ञा का उल्लंघन करां थे। भ्रम म्ह पड़े थे। तथा वासनायां एवं हरेक ढाळ के सुख-भोग के दास बणरे थे। हम दुष्टता अर ईर्ष्या म्ह आपणा जीवन जीवां थे। म्हारै तै लोग नफरत करै थे तथा हम भी आप्पस

म्ह एक दूसरे तै नफरत करया करै थे। 4किन्तु जब म्हारे उद्धारकर्ता पणमेसर की मानवता कै बाबत करुणा अर प्रेम प्रगट होवै 5उसनै म्हारा उद्धार करया। यो म्हारे बेकसूर ठहराये जाण कै खातर म्हारे किसे धर्म के काम्मां के कारण नीं होया बल्के उसकी करुणा के जरिये होया। उसनै म्हारी रुखाळ उस नहाण कै जरिये करी जिसम्ह हम दुबारा पैदा होवां सां अर पवित्र आत्मा के जरिये नये बणाये जावां सां। 6उसनै म्हारै पै पवित्र आत्मा ताहीं म्हारे उद्धारकर्ता यीशु मसीह कै जरिये भरपूर उँडेला सै। 7इब पणमेसर नै म्हारै ताहीं आपणी अनुग्रह कै जरिये बेकसूर ठहराया सै ताके जिसकी हम आस करण लागरे थे अनन्त जीवन के वारिसपणे नै पा सकां।

8यो कथन बिश्वास करण कै जोग्गा सै अर मैं चाहूँ सूं के थम इन बाततां पै डटे र्हो ताके वे जो पणमेसर म्ह बिश्वास करै सैं, आच्छे काम्मां म्ह ए लागे रहें। ये बात लोग्गां के खातर उत्तम अर हितकारी सैं।

9वंशावली सम्बन्धी विवादां, व्यवस्था सम्बन्धी झगड्यां झमेल्यां अर बेअक्ली तै भरे मतभेदां तै बच्चा रह क्यूँके उनतै कोए फैयदा नीं, वे बेकार सैं। 10जो माणस फूट गेरदा हो, उसतै एक या दो बै चेतावनी देकै न्यारा हो जा। 11क्यूँके थम जाणो सो के इसा माणस राह तै भटक गया सै अर पाप करण लागरया सै। उसनै तो खुद अपणे ताहीं कसूरवार ठहराया सै।

याद राक्खण की कीमे बात

12मैं थारै धोरै जब अरतिमास या तुखिकुस नै भेज्जूं तो मैरै धोरै निकुपुलिस आण का भरपूर जतन करणा क्यूँके मनै उडैए जाड्डा बिताण का इरादा कर राख्या सै। 13वकील जेनास अर अप्पुलोस ताहीं उनकी यात्रा कै खातर जो कीमे जरूरी हो, उसकै खातर थम भरपूर सहायता जुटा देणा ताके उन ताहीं किसे बात की कोए कमी ना रहवै। 14म्हारे लोग्गां ताहीं भी सतकर्मा म्ह लागे रहणा सीखना चाहिये। उनम्ह तै भी जिन ताहीं भोत घणा जरूरी हो, उस ताहीं पूरी करणा ताके वे विफल ना हों।

15जो मैरै गेल्या सैं, उन सारया का थमनै नमस्कार। म्हारे बिश्वास कै कारण जो लोग म्हारै तै प्रेम करै सैं, उन ताहीं भी नमस्कार।

पणमेसर का अनुग्रह थम सारया कै गेल्या रहवें।